

Mid-Day Dogri News Bulletin, 11 Sept. 2025

समा - 12:25 hrs.

<><><><><><>

Apple Parcel Van

जम्मू-श्रीनगर राष्ट्रीय जलमार्ग पर केई थाहें लहास-पस्सियां पौने ते सिड़कें पर गड़डिं दी आओ-जाई बुरी चाल्ली प्रभावत होने करी फल उत्पादें गी होआ करदे बड़े भारी नुकसान गी घट्ट करने दे मकसद कन्नै भारती रेलवे नै दिल्ली थमां बडगाम तोहड़ी प्राथमिकता दे आधार उपपर इक बशेश पार्सल ट्रेन चलाने दा ऐलान कीता ऐ। सोशल मीडिया पर इक पोस्ट च रेल मंत्री अश्विनी वैष्णव होरें आखेआ ऐ जे एह ट्रेन अज्ज बडगाम च सेअउएं कन्नै लद्दी जाहग ते उत्थुआं इसी पैहल दी बिनाह उपपर दिल्ली रवाना करोआया जाहग। लेफ्टिनेंट गवर्नर मनोज सिन्हा होरें इस गैह लेई प्रधानमंत्री नरेन्द्र मोदी ते रेल मंत्री अश्विनी वैष्णव हुंदा धन्नवाद करदे होई आखेआ ऐ जे एहदे कन्नै फल उत्पादें गी बड़ी बड्डी राहत थोग। तोआई मुखमंत्री उमर अब्दुल्ला होरें बी इस मदाद लेई रेल मंत्री हुंदा आभार जताया ऐ। सोशल मीडिया पर इक पोस्ट च मुखमंत्री होरें आखेआ ऐ जे बागवानी मैहकमा, फल उत्पादकें कन्नै तालमेल बनावे होई इस गैह गी तोढ़ चाढ़ा करदा ऐ।

<><><><><><>

Jitendra Pension

केन्द्री मंत्री डाक्टर जीतेन्द्र सिंह होरें कल नमीं दिल्ली च 14मीं कुल भारती पेंशन अदालत दी प्रधानता करदे होई पेंशनरें दिएं समस्याएं गी सुनेआ। जम्मू-कश्मीर थमां इक पेंशनर लेफ्टिनेंट (सेवानिवृत्त) बलबीर सिंह हुं'दे कन्नै गल्ल करदे होई मंत्री होरें'गी एह पता लग्गा जे उंदी दिव्यांगता सरबंधी पेंशन दे बकाये, जारी नेई कीते गेदे न। इस पर तुरत कार्रवाई करदे होई मंत्री होरें लाभार्थी दे पक्ख च 46 लक्ख 4 ज्हार रपे दे एरियर तुरत जारी करोआना जकीनी बनाया। मगरा सोशल मीडिया पर इक पोस्ट च डाक्टर जीतेन्द्र सिंह होरें आक्खेआ जे प्रधानमंत्री नरेन्द्र मोदी हुं'दी अगुवाई आहला एह इक नमां भारत ऐ जेहदे च सेवाएं च चिर नेई, सगुआं तुरत दस्तयाबी जकीनी बनाई जंदी ऐ।



Doda Tense

जम्मू-कश्मीर च आम आदमी पार्टी दे इक्कले विधायक मेहराज मलिक गी सार्वजनिक सुरक्षा कानून यानि पी.एस.ए तैहत हिरासता च लैते जाने दे मगरा कल डोडा ते एहदे कन्नै लगदे इलाकें च तनोतनी बनी दी रेई ते प्रदर्शनकारिएं ते सुरक्षाबलें बश्कार हिंसक झड़प्फां होइयां। आकाशवाणी दे जम्मू संवाददाता दी रिपोर्ट मूजब, जंदे रोज एह प्रदर्शन शुरु होए ते केई थाहें पर सुरक्षाबलें आसेआ प्रदर्शनकारिएं गी खिंड-बिंड करने लेई लाठीचार्ज ते अत्थरूं आहनने आहली गैस दा इस्तेमाल बी कीता गेआ। जिले च बंदिशें आहले हुक्म लागू करी दिते गेदे न ते संवेदनशील इलाकें च बाददू सुरक्षाबलें दी तैनाती जकीनी बनाई गेई ऐ। कल डोडा कन्नै लगदे भद्रवाह कस्बे च बी झड़प्फां होइयां जिस करी केई प्रदर्शनकारी ते दंडु अफसरें सने सुरक्षाबलें दे जवान बी जख्मीं होए।



Udhampur Accident

उधमपुर जिले च मोदी ग्राउंड दे नेड़े अज्ज होए दे इक सिड़क हादसे च इक जने दी मौत ते 3 जने गंभीर तौर पर जख्मीं होई गे। एह हादसा उसलै पेश आया जिसलै प्रवासी श्रमिकें गी लेइयै जा रदा इक टैम्पो ट्रैवलर सिड़कें पर पुट्ठा होई गेआ। हादसे च इक व्यक्ति दी मौके पर गै मौत होई गई। ओहदी पन्छान बिहार दे रौहने आहले शकील अहमद दे तौर पर कीती गई ऐ। एह सब्भै श्रमिक जम्मू थमां अनंतनाग जारदे हे जिसलै उंदी गड्डी हादसे दा शिकार होई गई। मुकामी लोकें, पुलस दी मदाद कन्नै जखिमएं गी जी.एम.सी उधमपुर पुजाया। पुलसै इस सरबंधै च मामला दर्ज करियै अगड़ी जांच शुरू करी दिती ऐ।



Hangul Conf

हंगुल सने विलुप्त होने दी कगार पर पुज्जी गेदे खुर आहले होरनें जनौरें बारे स्कॉस्ट कश्मीर च कल्लै थमां दुए अंतर्राष्ट्री सम्मेलन दा आगाज़ होआ। त्रंऊ दिनें दे इस सम्मेलन दा मकसद कश्मीर दे मशहूर हंगुल हिरण सने एहदे कन्नै जुड़ी दिएं होरनें प्रजातिएं दे संरक्षण सरबन्धी जरूरतें गी उजागर करना ऐ। देसै दे बक्ख-बक्ख हिस्सें सने होरनें मुल्खें जि'आं अमरीका, कनाडा, ब्रिटेन, मध्य पूर्व ते मध्य ते दक्खन एशिया दे मुल्खें थमां बी वन्य जीवें सरबन्धी तकरीबन 200 माहिर-विशेषज्ञ इस सम्मेलन च हिस्सा लै करदे न।



GST Reforms

समूलचे जम्मू-कश्मीर च आम लोकें ते कारोबारिं बी हाल च सरकार आसेआ जी.एस.टी दिं दरे च कटौती दे ऐलान दा बड़ा मता सोआगत कीता ऐ। अगली पीढ़ी दे एकडे जी.एस.टी सुधारे दे तैहत सरकारै घरे च इस्तेमाल होने आहले इलैक्ट्रॉनिक समेयान गी मता किफायती बनाइयै मझाटले तबके दे लोकें गी बड़ी बड़ी राहत दिती ऐ। एयर कंडिशनरे, डिशवाँशरे ते एल.सी.डी ते एलईडी टेलीविजनं पर जीएसटी दी दर गी 28 फीसद शा घटाइयै 18 फीसद करी दिता गेआ ऐ।

<><><><><><>

NH 44

जम्मू-श्रीनगर राष्ट्री जरनैली सिड़कें पर अज्ज छड़ी हौली मोटर गड्डिं गी दिनै बेल्ले गै जम्मू थमां श्रीनगर बक्खी जाने दी इजाजत दिती गेदी ऐ। ट्रैफिक पुलस दे अधिकारिं दा आखना ऐ जे जरनैली सिड़कें पर थरड इलाके आहले हिस्से च अजे रस्ता गिल्ला ते तलैहट भरोचा ऐ इस करियै बड़ी मोटर गड्डिं दी आओ-जाई दी खुल्ल फिलहाल नेई दिती गेदी ऐ। तोआई मुगल रोड पर अज्ज छड़ी हौली मोटर गड्डिं गी श्रीनगर थमां जम्मू बक्खी औने दी खुल्ल दिती गेदी ऐ।

<><><><><><>

PTC-Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बशकार ऐ ते ओह जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोइचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोइचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोइचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 14 September 2025 संजा 6 बजे कोला पैहले -पैहले आइए दस्ती जमा करोआनी होग। इस बारे व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>